

欽定全唐文

欽定全唐文卷六百五十九目錄

白居易四

李佑授晉州刺史制

武寧軍將王昌涉等授官制

馬總亡祖母韋氏贈夫人制

路貫等授桂州判官制

駙馬都尉鄭何除右衛將軍制

封太和長公主制

宋朝榮加常侍制

贈陣亡軍將等刺史制

諸道軍將等授官制

裴度韓宏等各賜一子官并授姪女壻等制

入回紇使下軍將官吏夏侯仕戡等四十人授卿

監賓客諮議衛佐同制

盧昂可監察御史裏行知轉運永豐院制

張維素亡祖紘贈戶部郎中制

興州刺史鄭公逵授王府長史李循授興州刺史

同制

權知陵州刺史李正卿正除刺史制

知渭橋院官蘇洌授員外郎依前職前進士王績
授校書郎江西巡官制

湖南都押衙監察御史王瓘可柳州司馬依舊職
制

安南告捷軍將黃士儻授銀青光祿大夫試殿中
監制

授徐綰兵部員外郎李光嗣右司員外郎制

王鑑可刑部員外郎制

京兆府司錄參軍孫簡可檢校禮部員外郎荆南
節度判官浙東判官試大理評事韓欽可殿中
侍御史巡官試正字晁朴可試協律郎充推官
同制

冀州奏事官田練可冀州司馬兼殿中侍御史制
薛常翹可邢州刺史本州團練使制

牛元翼可檢校左散騎常侍深州刺史御史大夫
制

王衆仲可衡州刺史制

田盛可金吾將軍勾當左衛事制

陳楚男王府諮議參軍君賞可定州長史兼御史

軍中驅使制

崔承寵可集州刺史制

前貝州刺史崔鴻可重授貝州刺史制

前吉州刺史李繁可依前吉州刺史制

瀛漠州都虞候萬重皓可坊州司馬制

崔墉可河南府法曹參軍制

前河陽節度使魏義通授右龍武軍統軍前泗州

刺史李進賢授右驍衛將軍并檢校常侍兼御史大夫制

李元成等授官制

馬總準制追贈亡父請迴贈亡祖制

權知朔州刺史樂璘正授兼御史中丞制

神策軍推官田疇加官制

裴敞授昭義軍判官裴侔授義成軍判官各轉官

制

雲州刺史高榮朝除太子賓客河東都押衙制

韋綬等賜爵制

烏重明等贈官制

羽林龍武等軍將士各加改轉制

新羅賀正使金良忠授官歸國制

除裴均中書侍郎同平章事制

除段祐檢校兵部尚書右神策軍大將軍制

除趙昌檢校吏部尚書兼太子賓客制

欽定全唐文卷六百五十九

白居易 四

李佑授晉州刺史制

勅牧守之官與吾共理下之安否繫乎其人必稽前功方降是命某官李佑夙負材器累經任用當領軍郡頗著政聲而平陽舊都近罷征鎮土疆事物既廣且殷藉爾良能爲予撫字夫均其征役簡其科禁謹身省事以臨其人而人不安未之有也往宏是道以康晉人可依前件

武寧軍將王昌涉等授官制

勅王昌涉等早以材力召募從軍元和以來南征北伐咸有勞績著於一時主帥上聞乞加褒賞故以寺卿憲職序而寵之無棄前功在申後効可依前件

馬總亡祖母韋氏贈夫人制

勅某官馬總亡祖母韋氏播茲懿範貽厥嘉謀施及孝孫實居貴仕將明餘慶其在追榮不惟垂裕後昆抑且光昭幽壤宜降封邱之命以慰令伯之心可贈某夫人

路貫等授桂州判官制

勅藩隅之重委以侯伯軍府之要掌在賓寮貫等以文行

修身以智謀從事佐廉問澄清之務撫華夷錯雜之人俾其又安實在參贊宜及寵命以光所從可依前件

駙馬都尉鄭何除右衛將軍制

勅周設七萃漢列八屯皆以拱衛王宮肅嚴徽道統茲駢吏其屬親賢某官鄭何擢秀士林挺質公器以貞和陶其性以禮樂文其身善積德門慶連戚里况久踐名職累著聲猷念舊獎能宜加榮寵環列之尹不易其人俾宣力於爪牙不失親於肺腑可右衛將軍餘如故

封太和長公主制

勅公主之封號也或以善地或以嘉名立愛展親茲惟舊
典第四女端明成性和順稟教靜無違禮故組紉有常訓
動必中節故環珮有常聲歲茂穰華日新淑問乃眷肅雍
之德俾開湯沐之封可封某公主

宋朝榮加常侍制

勅河東節度都押衙試太子賓客兼御史中丞宋朝榮嘗
因戰功擢領邊郡揆能適用故有轉遷龍樓上寮衙門右
職雖有兼命未表殊恩宜加騎省之榮不改憲臺之重以
茲寵任足報忠勲爾其敬承無墮乃力可檢校左散騎常

侍餘如故

贈陣亡軍將等刺史制

勅故某官某等王師問罪至於淄青爾等同執干戈親當
矢石忠而盡瘁勇而亡身或退卒於師或進歿於戰俱死
王事深惻朕心念捐軀於軍前宜追命於泉下郡守之貴
以示褒榮可依前件

諸道軍將等授官制

勅平齊之役也諸軍指期衆校合戰某官等各輸戮勇同
樹勲勤永思積日之勞頗媿逾時之賞故於獎授有所超

遷朝右貴班官坊清秩或參憲職分以命之庶知我心不
忘忠力可依前件

裴度韓宏等各賜一子官并授姪女壻等制

勅某官某等謁廟郊天改元肆眚是爲大慶與衆共之矧
股肱心膂之臣與吾同體延賞任子其可廢乎爾等或以
文華或以吏職有所修立稟於義方自當褒升况霑慶澤
俾舉展親之典用叶推恩之道猶子愛壻各命以官爾其
敬承無忝朝獎可依前件

入回紇使下軍將官吏夏侯仕戡等四十人授卿

監賓客諮議衛佐同制

勅某官夏侯仕戡等前命鄭懼之入回紇也爾等參護使
車用祇王命悉心盡力有恪恭跋涉之勤焉宜以省寺軍
衛之班宮坊府邸之用舉爲賓典分以寵之辨等旌勞於
是乎在可依前件

盧昂可監察御史裏行知轉運求豐院制

勅虢州司戶參軍盧昂前負瑕疵事多曖昧今聞修省善
亦昭彰况有大僚同知情狀且明非罪仍舉有才吾信人
言遂可其奏爾思自効無辱所知可依前件

張維素亡祖紘贈戶部郎中制

勅右散騎常侍張維素亡祖某縣令某德合上元才終下
位命屈於當代慶流於後昆故其孝孫實登貴仕經曰無
念爾祖詩曰貽厥孫謀此言孫之謀能顯揚其先祖之德
能垂裕於後也不追榮於列宿曷旌德於太邱可贈戶部
郎中

興州刺史鄭公達授王府長史李循授興州刺史

同制

勅鄭公達等或以行稱或以才舉進修所致班秩不卑改

命序遷各適其用且乘朱輪於郡邸曳長裾於王門士子
名宦至斯亦不爲不遇也立朝案部各敬爾官可依前件
權知陵州刺史李正卿正除刺史制

勅審材之要考察爲先吾之於人試乃可用李正卿頗闢
吏道因假郡符畏法愛人善於其職夫速旌其能則吏勸
久於其政則化成未可轉遷就加真秩副吾知獎無怠始
終可陵州刺史

知渭橋院官蘇洎授員外郎依前職前進士王績
授校書郎江西巡官制

勅某官蘇洵嘗以幹良分領劇務受任稱職主者上聞績
既有成賞安可缺前進士王績亦以藝學籍名太常著爲
令聞及此慰薦一以課進一以才升咸加班榮同以褒獎
臺官校職爾各欽承可依前件

湖南都押衙監察御史王瓘可柳州司馬依舊職

制

勅某官王瓘郡司馬之官秩祿頗厚凡在戎行有軍課者
多兼命以優寵焉而瓘以鞭弭橐鞬從事征鎮前後主帥
咸稱有功宜加新命仍率舊職蓋欲旌徃勞而責來効也

爾其勉之可兼柳州司馬

安南告捷軍將黃士儻授銀青光祿大夫試殿中

監制

勅某官黃士儻戎首來降陪臣告捷服勤靡盬將命無違
宜以恩榮獎其勞効貴階崇秩兼而寵之可依前件

授徐綰兵部員外郎李光嗣右司員外郎制

勅具官徐綰以丞相之子爲尚書郎人得見於會朝而不
得見於私室其言不敢近政其動未嘗違謙用是寡尤式
彰能訓論者美宣祖大臣以行至移風稱易名者必曰光

嗣之王父也爾克敬有後敏以自圖多所周防恐墜遺法而皆以去列可使陟居武庫部都曹郎選惟重并舉而授無墮當官可依前件

王鑑可刑部員外郎制

勅刑曹郎闕朕詔執事擇可以善於其職者而殿中侍御史王鑑自居殿中能察非法連鞠庶獄多協平允加以溫敏靜專可當是選一歲之獄決在秋冬今方其時宜敬乃職

京兆府司錄參軍孫簡可檢校禮部員外郎荆南

節度判官浙東判官試大理評事韓欽可殿中
侍御史巡官試正字晁朴可試協律郎充推官

同制

勅某官孫簡等凡使府之制量職之輕重以命官揆時之
遠近以進秩俾等殺有常序遷次有常程勞逸均而名分
定矣簡自登憲司佐相幕府暨糾天府皆有可稱而欽等
亦以文學發身謀畫効用荆揚浙右實籍賓僚况今之公
卿大夫皆由此途出慎爾職事爾無自輕可依前件

冀州奏事官田練可冀州司馬兼殿中侍御史制

勅某官田練幹敏立身公勤濟事奉州將之手疏達軍人之血誠念其忠勞宜有寵擢假憲名於殿內遷郡秩於治中茲謂兼榮爾其敬受可依前件

薛常翽可邢州刺史本州團練使制

勅新授深州刺史薛常翽平蔡之役常領偏師實立勲勞遂膺寵任今屬方隅多故將守用能且以翽之長材居邢之要地故命魚符換郡熊軾移轅夫事至而功成時來而節見此忠良之事業也爾其念之哉可依前件

牛元翼可檢校左散騎常侍深州刺史御史大夫

制

勅某官兼御史中丞權知深州事牛元翼命官之要凡試吏者必俟成効然後即真而元翼有理戎之才扞城之畧權領軍郡能修武經士樂人安厥有成績是用假威臺憲真拜郡符仍以金貂示其兼寵吾聞忠臣立節烈士垂名其要無他得時而已勉竭才力副予斯言可依前件

王眾仲可衡州刺史制

勅前虔州刺史王眾仲聚學修身由文飾吏累經任使頗著良能前牧南康亦聞有政宜新印綬載領藩條而衡湘

之間蠻越雜處無以俗陋不慎乃事無以地遠而怠厥心
副吾陟明俟汝奏課可依前件

田盛可金吾將軍勾當左衛事制

勅右金吾衛將軍田盛夫任官至執金吾古今所榮重也
而盛生勲德門有文武畧居貴介而無佚領誰何而有勞
言念徼巡之功宜及轉遷之命處左攝事以表使能可依
前件

陳楚男王府諮議參軍君賞可定州長史兼御史

軍中驅使制

勅某官陳君賞夙承義訓幼有令聞專繼弓裘之名通知
軍旅之事因仍憲職兼佐郡符敬服寵章勉從任使

崔承寵可集州刺史制

勅太子左諭德崔承寵早登班級亟換星霜自陳力於貴
朝屢奉辭於外國職由事博績以勞成就力官坊旣申贊
諭之美分符郡邸佇聞刺舉之能宜勵公心祇承寵命

前貝州刺史崔鴻可重授貝州刺史制

勅前貝州刺史崔鴻嘗牧貝邱能修其職及辭印綬頗厯
去思相時之宜從人之望俾換新命再臨舊邦况聞貯蓄

時材諳詳物務而方州思理侯伯薦能勉勤爲政之心勿
忝知人之舉

前吉州刺史李繁可依前吉州刺史制

勅前吉州刺史李繁累奉藩條皆奏課第故移緡雲之政
俾牧廬陵之人雖降璽書未臨郡邸屬魚章改造熊軾追
還事旣謀新職宜仍舊勉率分憂之任庶成來暮之謠

瀛漠州都虞候萬重皓可坊州司馬制

勅某官萬重皓嘗資武力早備戎行頗歷艱虞亦聞勤効
而藩隅未靖遷轉從宜言念前勞宜加優秩可坊州司馬

崔墉可河南府法曹參軍制

勅鄆曹觀察判官監察御史裏行崔墉文行飾躬公清奉職士林推美藩府薦能軍旅之間久資其用忠勤之後不隕其名宜拔才於功臣俾試吏於府掾可依前件

前河陽節度使魏義通授右龍武軍統軍前泗州刺史李進賢授右驍衛將軍并檢校常侍兼御史大夫制

勅文武之才內外迭用軍國之任出入遞遷斯所以優勲賢而均勞逸也某官魏義通以戎功積久榮委旌旄某官

李進賢以軍課居多寵分符竹各勤其職咸用所長是以河陽三城鎮靜而不擾泗濱一郡緝理而有勞我有禁軍爾宜分領親信則倚爲心膂動用則張爲爪牙苟非其人不副此任咸假貂蟬之貴仍兼憲職之榮勉哉二臣無替一志可依前件

李元成等授官制

勅黔州觀察使兼度支使李元成等或蘊蓄能才咨謀是藉或分領劇務課績有成并可奏書各遷憲職勉勤乃事無忝所知可依前件

馬總準制追贈亡父請迴贈亡祖制

勅夫積善者慶鍾於後顯揚者光昭於先而總貴爲邦君
賢爲國士荷貽謀之訓用率義之文上獻表章有所陳乞
朕念其祖德衰以臺郎所以復陳實必興之言慰范喬泣
涕之思庶使幽顯兩無恨焉可贈某官

權知朔州刺史樂璘正授兼御史中丞制

勅樂璘專習武經旁通吏道試補郡守以觀其能連帥上
聞果副所舉夫審官之要在因其所長而任之則政速成
而化易就也才旣試可官宜即真何以寵之就加憲職可

朔州刺史兼御史中丞

神策軍推官田疇加官制

勅田疇官列環衛職參禁軍慎檢有聞恭勤無怠顧是勞
効例當轉遷郡佐官寮以示兼寵

裴敞授昭義軍判官裴侔授義成軍判官各轉官

制

勅裴敞等昭義義成今之重鎮實藉賓介以參謀猷而二
帥皆勤於奉公精於辟士度才而授職循序而請官頗合
所宜咸可其奏可依前件

雲州刺史高榮朝除太子賓客河東都押衙制

勅高榮朝常領銳師入攻堅寇因累獎賞位至專城才有
所長宜遷戎職功不可忘兼進榮班勉事元戎無替勞効
韋綬等賜爵制

勅韋綬等去年春夏同奉寢園事集禮成副吾哀敬宜加
封爵以報恪勤可依前件

烏重明等贈官制

勅故某官烏重明等夫生樹功勤歿加褒飾有國之常典
也重明等在興元初常執勤於奉天策勲為定難無祿即

代有勞未圖星歲屢遷光塵不昧聞鞞之念予心曷忘俾
慰幽泉各追顯秩可依前件

羽林龍武等軍將士各加改轉制

勅夫軍衛警則內外嚴爵賞明則忠勤勸爾等咸以材力
列於禁營屬去年以來屢陳儀仗雖加賜予未答勤勞因
詔有司舉行賞典吾匪虛授爾宜敬承文武班資各從序
進可依前件

新羅賀正使金良忠授官歸國制

勅新羅使倉部郎中金良忠等朕以文明御時以仁信柔

遠聲教所及駿奔而來况溟漲一隅舟航萬里爾慕我化
我圖爾勞隨其等倫命以寵秩無替前効永爲外臣可依
前件

除裴垍中書侍郎同平章事制

門下朕聞后德惟臣臣德惟良在太宗時實有房杜贊貞
觀之業在元宗時實有姚宋輔開元之化咸克佑我烈祖
格於皇天朕祇奉丕圖懋繼前烈思欲貞百度和萬邦建
中於人垂拱而理求維房宋之化寤寐求思至誠感通上
帝眷佑果賚良弼輔予一人正議大夫行尚書戶部侍郎

上柱國賜紫金魚袋裴均器得天爵文爲國華行有根源
詞無枝葉忠敬恭順貫之以誠心方潔貞廉輔之以通識
玉立不倚金扣有聲洎內掌綸言密參樞務嚴重有大臣
之體溫雅秉君子之文每獻納之時動有直氣當顧問之
際言無隱情遠圖是經大事能斷匡予不逮時乃之功及
領地官且司邦賦會計務劇出納事殷投利刃而皆虛委
芬絲而必理厯試已久全才益彰宜登中樞以副僉望夫
宰輔者下執邦柄上代天工爲國著龜注人耳目爾尚降
乃德以親百姓廣乃志以序九流匡朕心以清化源從人

欲以致和氣予欲宣力汝爲股肱予欲詢謀汝爲心膂予
違望於汝弼勿謂不從汝言逆於朕心必求諸道獨立勿
懼直躬而行明聽斯言敬踐乃位嗚呼罔俾房宋專美於
前可中書侍郎同中書門下平章事散官勲賜如故主者
施行元和六年十一月

除段祐檢校兵部尚書右神策軍大將軍制

門下爲君之心惟功勞是念有國之典以賞勸爲先其有
輯睦師徒保綏黎庶盡勤王之節建護塞之勲則宜進以
官常委之軍要兼文武之秩參內外之榮斯所以彰念功

而明懋賞也四鎮北庭行軍兼涇原等州節度支度營田
觀察處置等使光祿大夫檢校工部尚書使持節涇州諸
軍事涇州刺史兼御史大夫上柱國鴈門郡開國公段祐
早膺事任累著公忠名因義聞位以勤致自分戎閭實控
塞門明舉武經大修邊務士卒有勇保障無虞虜不近邊
農皆狎野展執珪之勤禮懋戀闕之深誠方圖爾勞且遂
其志夫六官庀職大司馬列於前二翼分師大將軍處其
右長夏官以率屬領環衛而拱宸苟非信臣安可兼委嘉
乃實効副予虛求將慎重其腹心宜進登於喉舌敬服休

命勉揚令圖可檢校兵部尚書右神策軍大將軍知軍事
散官勲封如故主者施行

除趙昌檢校吏部尚書兼太子賓客制

門下王者以尚齒尊賢爲禮以念功任舊爲心况文武之
才有以兼備則中外之職所宜迭居所以寵舊勲而優者
德者也前荆南節度管內支度營田觀察處置等使金紫
光祿大夫檢校兵部尚書兼江陵尹上柱國天水郡開國
公趙昌聚學飾身修誠致用久膺事任累著勲猷統護交
州威惠之聲克振鎮臨南海撫循之政有經自移部荆門

馳心魏闕增修職貢益勵忠勤爰舉寵章用旌茂績夫望
優四皓然後能調護春闈才冠六卿然後能綱紀會府惟
爾年德足尚可以周旋其間宜增喉舌之榮以崇羽翼之
任服我休命其惟懋哉可檢校吏部尚書兼太子賓客散
官勲封如故主者施行

欽定全唐文卷六百六十目錄

白居易五

除鄭綱太子賓客制

加程執恭檢校尚書右僕射制

除王佖檢校戶部尚書充靈鹽節度使制

除閻巨源邠寧節度使制

授吳少陽淮西節度畱後制

除程執恭檢校右僕射制

除郎官分牧諸州制

除張宏靖門下侍郎平章事制

授范希朝京西都統制

贈李吉甫先父官并與一子官制

除李絳平章事制

授韓宏許國公實封制

除裴度中書舍人制

除蕭俛起居舍人制

除崔羣中書舍人制

獨孤郁守本官知制誥制

授沈傅師左拾遺史館修撰制

除許孟容河南尹兼常侍制

除李程郎中制

裴克諒權知華陰縣令制

贈高郢官制

貶于尹躬洋州刺史制

贈裴均官制

除軍使邠寧節度使制

除韋貫之中書侍郎平章事制

除拾遺監察等制

除范傳正宣歙觀察使制

邊鎮節度使起復制

除任迪簡檢校右僕射制

除常侍制

除裴武太府卿制

杜佑致仕制

鄭涵等太常博士制

除韓臯東都留守制

中書舍人韋貫之授禮部侍郎制

薛存誠除御史中丞制

前長安縣令許季同除刑部郎中前萬年縣令杜

羔除戶部郎中制

京兆少尹辛祕可汝州刺史制

欽定全唐文卷六百六十

白居易

五

除鄭綱太子賓客制

門下王者重輔弼之任明進退之宜見可卽升知否則捨
茲朕所以推誠不惑與物無私者也銀青光祿大夫守門
下侍郎同中書門下平章事兼宏文館大學士上柱國賜
紫金魚袋陽武縣開國侯鄭綱早以令聞入參禁署永惟
勤績出授台司期爾有終匡予不逮歲月滋久謀猷寔微
罔清淨以慎身每因循而保位旣乖素履且鬱皇猷宜副

羣情罷茲樞務朕以其久居內職累事先朝思厚大臣貴
全終始俾就優閒之秩用申寬大之恩可太子賓客散官
勲封如故主者施行

加程執恭檢校尚書右僕射制

門下職參揆務權總戎麾必唯其人乃授斯柄自非望崇
垣翰功著旂常則何以副儀形之求稱節制之任我有休
命爾其敬承銀青光祿大夫檢校兵部尚書使持節滄州
諸軍事兼滄州刺史御史大夫橫海軍節度支度營田滄
景等州管內觀察處置等使上柱國邢國公食邑三千戶

程執恭義勇立身忠愨成性聚爲事業發爲勲猷歷事先
朝久專外間殿邦而山岳比鎮奉國而金石爲心勤修武
經居有循化洎執珪入覲班瑞言旋忠懇內激於心誠恭
順外形於詞氣爰舉酬庸之典稍增命秩之榮方圖前勞
且有後命朕思安封域望在勲賢任旣切於腹心位猶輕
於喉舌以守土勤王之效雖進官封念來朝述職之忠未
加寵數特升右揆俾在中樞勉終永圖無替成績可檢校
右僕射餘竝如故

除王佖檢校戶部尚書充靈鹽節度使制

門下靜邊之要選將爲先夫有統馭之才然後授以節制
之任有撫備之畧然後鎮以夷夏之衝期乎攘遏寇虞慎
固封域今予命爾時謂得人開府儀同三司檢校刑部尚
書兼右衛上將軍寧塞郡王食寶封二百五十戶王佖忠
厚立誠果斷効用慎始終而行有枝葉踐夷險而道無磷
緇早練武經果從軍職頃逢多壘實佐元戎節著臨危功
參定難位由勞致名以忠聞自列六卿且司七萃星霜屢
變金石彌堅宜申命於北轅俾過戎於南牧進地官以崇
新命極勲秩以褒舊功中簡朕心外諧僉議况五原重鎮

諸夏長城修戎政莫先於威聲牧邊民莫尚於惠實師雜
昆夷之悍訓必在和地爲獯虜之隣撫宜以信勉率是道
往分朕憂歲時之間期於報政委望斯在爾其聽之可檢
校戶部尚書兼靈州大都督府長史御史大夫充朔方靈
鹽定遠城節度副使知節度事管內支度營田觀察處置
押蕃落等使仍賜上柱國散官食實封竝如故主者施行

除閩巨源邠寧節度使制

門下華夷要地實爲蕃漢鈇鉞重柄必授忠賢况乎犄角
諸軍金湯中夏有坐甲護邊之旅任切於拊循有引弓犯

塞之虞寄深於備禦內作心腹外張爪牙苟非信臣不在茲選奉天定難功臣開府儀同三司檢校尚書右僕射兼羽林軍統軍御史大夫上柱國定襄郡王食邑一千三百戶閻巨源備知虜態明練兵符永惟頗牧之能宜授郿邠之寄長南宮而遷左揆壯西郊而委中權旣圖前勞且佇來效於戲十聯之帥可以觀政萬夫之長可以樹勲勉宏令猷副我休命可檢校尚書左僕射使持節邠州諸軍事兼邠州刺史御史大夫充邠寧慶等州節度管內支度營田觀察處置等使散官勲封竝如故主者施行

授吳少陽淮西節度畱後制

門下議事以制擇善而行是適變通庶臻康濟此王者所以宏德而息人也况聞外重寄淮右成師建有德以統藩方擇有才以領畱府仰惟令典今舉行之彰義軍馬軍先鋒兵馬使正議大夫檢校右散騎常侍使持節申州諸軍事申州刺史兼御史大夫會稽郡王吳少陽忠勞許國貴介成家蓄武畧於韜鈴宣吏能於符竹屬元戎旣歿謀帥其難朕將選眾以升試可而用推掌戎務已逾歲時而能和輯師人勤修土貢布寬簡有恒之政動悅人情守恭順

不踰之心靜俟君命有嘉大節可假中權宜進列於貂蟬
俾增威於貔武仍加勲秩式茂寵章嗚呼重觀其能我故
委之畱事載佇其效爾宜勉於後圖敬思是言往率乃職
可銀青光祿大夫檢校左散騎常侍依前兼御史大夫使
持節蔡州諸軍事權知蔡州刺史充彰義軍節度管內支
度營田申光蔡等州觀察處置等使畱後仍賜上柱國封
如故主者施行

除程執恭檢校右僕射制

門下臣之節極乎忠功君之柄先乎爵賞欲忠者之克懋

也故爵有加等欲功者之速勸也故賞不踰時古先哲王
實用茲道今我命爾因其舊章橫海軍節度支度營田滄
景等州觀察處置等使起復冠軍大將軍左金吾衛大將
軍員外置同正員檢校兵部尚書使持節滄州諸軍事兼
滄州刺史御史大夫上柱國邢國公程執恭業傳將畧名
在勲籍蘊天爵以修己忠孝兩全竭臣節而事君夷險一
致紀綱我列郡節制我成師動揚休聲靜著茂實自合符
徵旅奔命出疆暴露歷於三時供億出於二郡整衆而身
作師律伐謀而心爲戰鋒服金革而無辭當矢石而有勇

兩晦識雞鳴之信風高見隼擊之威遠畧旣申茂勲方集
朕以恒陽之眾蠢爾無知毆彼生人致之死地每一念至
惻然久之與其傷和而濟功曷若含垢而修德旣罷師旅
爰圖勤勞效且居多賞宜從重俾自夏官之長特升右揆
之崇獎忠勸功於是乎在承我休命爾其欽哉可檢校尚
書右僕射餘竝如故主者施行

除郎官分牧諸州制

漢宣帝云與我共理者其惟良二千石乎誠哉是言朕每
三復安得循吏副吾此心今之臺郎一時妙選嘗經任歷

率有才用雖典曹庀事其務非輕而卹隱分憂所寄尤重
是用竝命分牧吾人歲時之間期於報政戶部郎中某可
某州刺史兵部員外郎某可某州刺史云云朕高懸爵賞
佇期酬效咨爾夙夜其念之哉無俾龔黃專美前代

除張宏靖門下侍郎平章事制

門下夫佐佑天子變理陰陽平章法度登進賢哲外撫夷
狄內安元元使百官修其職一物不失其所此宰相之任
也朕思得良弼馴致此道咨予命汝其殆庶乎某官張宏
靖惟乃祖乃父代居相位咸有成績書於旂常爾有忠正

恭肅文以禮樂日濟其美振揚家聲一時之人謂之才子
亟登清貫益著令聞洎出刺陝部移鎮蒲坂政不苛細甚
得人心寮吏將卒皆樂爲用清簡之化聞於京師由是鄭
風緇衣之好漢庭元成之美朝望時議翕然與之人謀既
同朕志亦定乃用登爾於佐輔授爾以大政尚克欽乃嘉
命業乃代官竭其股肱服我前訓嗚呼三代爲相邦家之
光爾其念哉無替乃前人之徽烈

授范希朝京西都統制

門下閶闔風至太白星高謀帥護邊國之大計具官范希

朝忠貞勤儉以爲質惠和智勇以爲用一代名將三朝信
臣朕以西邊列鎮三四若有總統則易成功思得良帥有
威名者并護諸將歲一巡邊乘秋順令揚其威武則南牧
之馬引弓之人知我有備不戰而去誰其任者無如希朝
以爾有朔方之榮有振武之效功在疆場名聞羌戎惟實
與聲皆副是選今拜爾爲大將尊爾爲司徒節制進退一
令諮稟倚望如右可不慎歟可充京西都統

贈李吉甫先父官并與一子官制

勅某官李吉甫出入將相迨今七載而能修庶職敘彝倫

毗予一人以底於道夙夜不怠厥功茂焉夫忠於君者教本於親寵其身者賞延於嗣於是乎有飾終之命有任子之恩所以感人心而勸臣節也惟茲舊典可舉而行

除李絳平章事制

門下昔在堯舜聰明文思尚賴良臣實相以濟况朕薄德不逮先王是用急疾於求賢置之於左右俾承弼納誨以匡不逮言雖逆耳必求諸道事苟利人咸可其奏茲足以宣股肱之力成天下之務歷選多士爰得良輔乃降厥命其聽之哉某官李絳齋莊嚴重內明外直進退舉措有大

臣體自參內職每備顧問忠讜之操終然不渝及貳地官
專領財賦未逾周月亦有成績歷試多可人望攸歸俾登
中樞無易絳者於戲爾以文學入仕以正直奉上才膺大
用職亦屢遷十年之間位至丞相何以報國在乎匪躬欽
哉懋哉無忝朕命

授韓宏許國公實封制

梁宋之交水陸合會人雜難理軍暴難戢因變肆亂往往
有焉唯此一方朕嘗憂慮今有良帥鎮而撫之政立功成
宜舉賞典某官韓宏以長材大畧作我藩臣本於忠力輔

以政理自分閫寄在浚之郊巖貞師律恭守朝憲訓兵積
粟明罰信賞軍和食足禮節並行河南晏如於茲一紀是
則有大勲於國有大惠於人會課議功無出其右夫有過
人之效則有加等之命古之王者所以賞一人而天下勸
者用此道也可不務乎是用建於上公授之真食以示殊
寵以旌殊績欽我休命子孫其保之

除裴度中書舍人制

司勳郎中知制誥裴度以茂學懿文潤色訓誥體要典麗
甚得其宜施之四方朕命惟允况中立不倚道直氣平介

然風規有光近侍臺郎滿歲班列當遷綸閣之職所宜真授可中書舍人

除蕭俛起居舍人制

勅左補闕翰林學士蕭俛頃居諫列職司其憂夙夜孜孜拾遺左右朕嘉乃志選在內庭自參密近益見忠謹始終不替尤足多之記事之官一時清選俾膺是命以宏勸獎可守起居舍人依前件

除崔羣中書舍人制

庫部郎中知制誥翰林學士崔羣端厚和敏飾以文學溫

良忠敬得侍臣之風自列內朝兼司誥命事煩而益密職久而彌精六年於茲勤亦至矣况小大之事常所訪問盡規極慮宏益居多所宜寵以正名式光禁職敬乃嘉命其
惟有終

獨孤郁守本官知制誥制

考功員外郎史館修撰獨孤郁爲人沉實敏行寡言粲然
文藻秀出於眾累升諫列再秉史筆洎掌功論率以直聞
求之周行不可多得而掖垣近職綸閣重選俯詢時議爾
宜居之

授沈傅師左拾遺史館修撰制

京兆府鄠縣尉沈傅師庶職之重者其史氏歟歷代以來甚難其選非雄文博學輔之以通識者則無以稱命今茲命爾其有旨哉昔談之書遷能修之彪之史固能終之惟爾先父嘗撰建中實錄文質詳畧頗得其中爾宜繼前志率前修無忝爾父之官之職可左拾遺史館修撰

除許孟容河南尹兼常侍制

昔吳公袁安爲河南尹守皆能以廉平清肅馭吏教人孰能繼之我有良吏某官許孟容才志甚大言論甚高在臺

閣間藹然公望嘗尹京邑觀其器用臨事能守當官敢言
不吐剛以茹柔不附上以急下政無煩碎甚合衆心及是
轉遷頗有遺愛河洛千里都畿在焉凡所選任必歸望實
考言詢事非爾而誰不忘舊政可立新績仍以騎省申而
寵之

除李程郎中制

隋州刺史李程頃以詞學入參訓命旋以才用出領詔條
漢東大郡委之共理勵精爲政三年有成中外序遷朝之
彝典尚書郎缺爾宜補之

裴克諒權知華陰縣令制

華陰令卒非選補時調租勉農政不可缺前鎮國軍判官
試大理評事裴克諒久佐本府頗有勤績屬邑利病爾必
周知宜假銅墨試其才理待有所立方議正名

贈高郢官制

故尚書右僕射高郢立身從事皆有本末在亂不汙可以
言忠守官不撓可以言直以道佐主可以言正以年致仕
可以言禮有一於此人鮮克舉况備四者不亦君子乎天
不憝遺深用軫悼宜加褒贈以旌其風仍俾善人聞而知

勸可贈某官

貶于尹躬洋州刺史制

中書舍人于尹躬其弟臯謨職汙狼籍雖無從坐之法合當失教之責然以典職詔命恭勤五年我卽念勞爾宜思過俾居近郡茲謂得中

贈裴垪官制

故太子賓客裴垪忠正恭慎佐予爲理事君盡禮徇國忘身積憂與勞構成疾恙以致淪逝念之惻然頃屬多故未申禮典永惟衰飾寧忘於心今則命數之間宜從加等庶

使忠於君者有以勸焉可贈某官

除軍使邠寧節度使制

金方之氣凝爲將星王者法天選命豪傑授之以鈇鉞拜
爲將軍以威西戎以護中夏而倚望若是安可非其人哉
某官某出忠入孝仗信抱義行有餘力學劍讀書鬱然將
材用兼文武自領軍衛爲我爪牙夙夜警巡不懈於位材
官知訓環列增勲服勤五年茲爲成績可以移用使之守
疆邠邠大藩控扼胡虜若得良將則無外虞知臣者君非
爾不可仍加副相以重是行勉樹勤勞式光寵擢

除韋貫之中書侍郎平章事制

門下周宣漢宣繼體之主一得申甫一得魏邴咸克致理
號爲中興朕嗣位以來永監前烈惟是賢俊寤寐求思歷
選周行乃獲時彥宜以政柄舉而授之具官韋貫之溫重
明正國之公器當官必守臨事能斷簡在朕志迨今累年
乃者擢居諫司以觀其直出領符竹以觀其理煩之劇務
以觀其用訪之大政以觀其體歷試必中衆望允屬倚之
爲相僉曰宜哉可中書侍郎同中書門下平章事夫臣事
君以忠后從諫則聖靡不有始鮮克有終理化不成恆由

於此今我與爾永終是圖雖休勿休以臻其極嗚呼二宣之業吾有望焉

除拾遺監察等制

渭南縣尉庾敬休等咸文行清茂士之秀者宜從吏列擢在朝行各隨才用分命以職司諫執憲佇有可稱

除范傳正文宣歙觀察使制

古之諸侯三載考績選其賢者命爲長率所以勸功行而興理化也蘇州刺史范傳正文學政事二美具焉選自郎署出分符竹江南列郡連領者三所至之部悉心爲理明

諭朝旨恭守詔條謹身省事以臨其下政簡而肅意誠而明吏不能欺人是以息而去思之歎來暮之謠往復有政聞於人聽雖古循吏蔑以加之朕以陵陽與壤土廣人庶其地有險所寄非輕跡其前效可當此選况黜歛之遺愛尚在吳興之新政方播升車便道足慰人心固當望風自安計日而理倚注於爾往宜欽哉

邊鎮節度使起復制

執親之喪三年禮也聖人不得已而奪之金革之事無避權也忠臣不得已而從之某官某握我兵要守在塞門忠

勇威惠合以爲用師人悅附戎虜畏服迨彼諸部聞其姓名况歲廣屯田日討軍實載陳遠畧方集大勲自罹家難遽致公政茹荼銜恤已過旬時而軍旅不可以無帥疆場不可以無主且慮人慢或生戎心蓋臣節大於孝思王事急於情禮捨輕從重徇公滅私變而通之正在於此俾加戎秩用護邊封往復舊職無違朕命

除任迪簡檢校右僕射制

書曰德懋懋官功懋懋賞此先王所以匡飾天下也其有忠勞輸於國惠澤及於人高位厚賞朕無所愛某官任迪

簡項以本鎮元戎來朝俾佐師律實掌畱務屬偏裨不軌
誘動軍部亂行忤命至於再三而迪簡冒白刃於戎首置
赤心於人腹挺身誓眾罔不率從羣情既歸因命爲帥况
閭閻蕩析倉廩匱竭野有餓莩軍無見糧又能推恩信以
結眾心率勤儉以勸生業士旅悅附流庸思歸周月之間
泰然安堵開置幕府叶和親鄰俾予無憂時乃之力夫爲
將守立功如斯不加爵賞何勸來者建官惟百端揆長之
自非勲賢不在此選以是加等之命寵乃殊常之績俾增
威於閭外仍就拜於軍中爾其欽哉無替厥命

除常侍制

某官某往以強毅剛正見稱於時擢在左曹俾之駁議旋以言動小有過差左遷遠藩亦聞有政雖經三黜僅歷二紀而堅直之氣終是不渝人之所難亦足嘉尚宜可束帶立之於朝正色讜言時有所取俾登西掖仍珥右貂從容前後以備顧問

除裴武太府卿制

勅聚九州之賦辨百貨之名按其度程謹其出納孰爲主者外府上卿務殷秩崇不易其選某官裴武有通敏之識

有倚辦之才以茲器用早膺任使小大之務罔不勵精累有勤績存乎官次而受藏之府國用所資若非使能何以集事俾陞顯列仍委劇務爾宜率其官屬欽乃職司會帑藏出入之要修權量平校之法以遵成式無使改易謹而守之斯爲稱職

杜佑致仕制

勅盡悴事君明哲保身進退始終不失其道自非賢達孰能兼之司徒同平章事杜佑以長才名畧爲國元臣歷事四朝殆逾三紀出專征鎮爲諸侯帥入贊台袞爲王室輔

嘉猷茂績中外洽聞寵任旣崇勤勞亦至頃以年登致仕
退請懸車方深倚注久未得謝勉就牽率迨茲累年今抗
疏披誠至於數四敦諭頗切陳乞彌堅期於必遂理不可
奪守冲知止佑實有焉賢哉大夫今古同道宜從優異之
命式表褒崇之禮尚資耆望俾傳東朝可太子太師致仕
如天氣晴和亦任朝謁昔祁奚申叔皆就請老國有大事
入議否臧忠臣愛君豈必在位永觀前事期副茲懷

鄭涵等太常博士制

某官鄭涵等竝早以文行久從吏職輩流之間頗爲淹滯

况雅有學識進修不已禮官方缺宜當此選凡朝廷禮制或損益有宜中外諡議或褒貶不決爾爲博士皆得正之所任非輕各敬乃事竝可太常博士

除韓臯東都畱守制

國之都府半在東州未遑時巡方委畱鎮非位望崇盛加之勲舊者則不足以允僉屬而副重寄也刑部尚書韓臯名德之後鬱然公才正行通規貫乎始終累遷臺府連鎮藩維入修職業出樹風聲故多遺愛著聞中外况一登朝序殆三十年舊德耆望無居其右俾乂東夏僉以爲然乃

加冢卿以示崇寵敬服嘉命永孚於休可檢校吏部尚書
東都畱守

中書舍人韋貫之授禮部侍郎制

勅典郊祀之禮獻賢能之書今小宗伯實兼二事非直清
明正者不足以處之中書舍人韋貫之沉實堅峻文以禮
樂行成於內移用於官公直之聲滿於臺閣頃以詞藻選
登禁掖秉筆書命時稱得人久積勤勞宜有遷轉可使典
禮以和神人可使考文以第俊秀儀曹之選僉議所歸往
修乃官無替厥問可禮部侍郎餘如故

薛存誠除御史中丞制

勅庶官之政得人則舉況中執憲準繩之司所以提振紀綱端肅內外蓋一職修者其斯任之謂歟給事中薛存誠選自郎署列於左曹居必靜專言皆讜正章疏駁議多所忠益可以執憲立於朝端况副相方缺臺綱是領糾正百官爾得專之夫直而不絞威而不猛不附上而急下不犯弱以違強率是而行號爲稱職敬服斯命往其懋哉可御史中丞餘如故

前長安縣令許季同除刑部郎中前萬年縣令杜

羔除戶部郎中制

前長安縣令許季同前萬年縣令杜羔等頃自郎署分宰京邑而長吏待之小乖常禮雖同辭托故動未得中然遠恥以退道不失正各從免職亦旣踰時况文行政能皆推於眾詢諸時議宜有遷授尚書郎缺方選才良憲部人曹俾膺竝命季同可刑部郎中羔可戶部郎中

京兆少尹辛祕可汝州刺史制

京兆少尹辛祕頃守吳興時逢擾亂安人殄寇節效可稱出倅戎車入貳京輦亦有政績著於官常今以汝汾軍郡

之大方求良吏委之分憂詢事考能爾當其選往卽乃土
以舒吾人可汝州刺史